

RESOLUCIÓN POLA QUE SE AUTORIZA UN PLAN EXPERIMENTAL DE PESCA CON TRASMALLOS PARA AS CONFRARÍAS DE PESCADORES DA RÍA DE AROUSA PARA O ANO 2023.

Feitos:

A Federación Provincial de Confrarías de Pescadores de Pontevedra, con data do 13 de decembro de 2022, achega proposta dun plan experimental de pesca con trasmallos na Ría de Arousa, por dentro das liñas de referencia do anexo III establecidas no Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia, propoñéndose que a época autorizada da tempada 2023 abranga desde o día 15 de xaneiro ata o 16 de xuño do ano en curso.

Con data 13 de decembro de 2022, solicítase o informe técnico correspondente.

Fundamentos técnicos e xurídicos:

O artigo 50.3 do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia, establece que as embarcacións menores de 2,5 TRB ou 1,75 GT poderán utilizar trasmallos por dentro do anexo III a unha distancia mínima de 100 metros da costa ou a unha profundidade mínima de 5 metros, no período comprendido entre o 1 de decembro e o 30 de abril, salvo o período en que se decrete a veda temporal dalgúnha especie ou zona.

O artigo 3º.3 de dito Decreto, dispón: "Autorizarase o uso de artes, aparellos, útiles, equipamentos e técnicas diferentes aos regulados neste Decreto mediante plans experimentais".

Asemade, na disposición transitoria terceira, especificase que os plans experimentais referidos no artigo 3º.3, manteñen a regulación prevista no artigo 3º bis do Regulamento da actividade pesqueira e das artes e aparellos de pesca permisibles en Galicia, aprobado polo Decreto 424/1993, do 17 de decembro, ata que non se aprobe a norma que o substitúa.

O artigo 3.2 do Decreto 198/2004, do 29 de xullo, que modifica o Decreto 424/1993, do 17 de decembro, polo que se aproba o regulamento da actividade pesqueira e das artes e aparellos de pesca permisibles en Galicia, establece que a Consellería de Pesca (a día de hoxe Consellería do Medio Rural e do Mar) poderá, con carácter experimental e temporal, aprobar plans de pesca co obxecto de estudar os efectos



derivados da utilización de novas artes e aparellos, ou da modificación da regulación dos definidos neste regulamento, cara a unha mellor xestión dos recursos pesqueiros.

Os informes técnicos constatan que a partir do mes de xuño a porcentaxe de individuos xuvenís capturados se incrementa nun 80% respecto a meses anteriores, e recomandan limitar o emprego das diferentes artes de pesca nas zonas más interiores das rías (por dentro do anexo III). O propio sector solicita, ao igual que os dous últimos anos, o establecemento dunha veda para o choco, que será obxecto dunha resolución específica máis adiante.

O Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, regula na súa disposición adicional novena a delegación de competencias. Asemade, a Resolución do 4 de maio de 2012, de delegación de firma no secretario xeral do Mar da Consellería do Medio Rural e do Mar, establece no seu artigo 1 que: "Delégase a firma dos seguintes actos e resolucións ditados en virtude das competencias propias da persoa titular da Consellería do Medio Rural e do Mar, na persoa titular da Secretaría Xeral do Mar:" "e): A aprobación de plans experimentais de pesca a que fai referencia o artigo 3 bis do Decreto 198/2004, do 29 de xullo, que aproba o Regulamento da actividade pesqueira e das artes e aparellos de pesca permisibles en Galicia.".

Tendo en conta o anterior,

RESOLVO:

Aprobar o plan experimental de pesca con ***trasmallos*** para as embarcacións das confrarías de pescadores da Ría de Arousa, baixo os seguintes termos e condicións:

1º.- Participantes.- Unicamente participarán no plan aquelas embarcacións menores de 2,5 TRB ou 1,75 GT que posúan no seu permiso de explotación a arte de trasmallos e que teñan porto base na zona xeográfica III de Arousa, así como aquellas que teñan autorizado un cambio temporal de modalidade á citada arte, debendo solicitar expresamente a súa inclusión ao mesmo.

2º.- Arte.- A arte a utilizar será o ***trasmallo***, que se axustará ás seguintes características recollidas no artigo 48 do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia:



1. A dimensión de mallas autorizada dos panos exteriores do trasmallo estará comprendida entre 400 e 500 milímetros, e a do pano central entre 70 e 90 milímetros. Estas dimensíons máximas de malla poderán superarse sempre que a altura da arte non supere o establecido no punto 2 deste artigo.
2. Cada unha das pezas de rede ou panos que componen o trasmallo terá unha lonxitude máxima de 50 metros e unha altura máxima, logo de armada, entre trallas ou relinges de 2,5 metros.
3. A lonxitude máxima total do trasmallo que se calará por embarcación e día será de 10 pezas por embarcación, más 10 pezas por tripulante enrolado e a bordo, cun máximo por embarcación de 30 pezas.

3º.- Horario.- O horario de traballo é o establecido no artigo 49º do Decreto 15/2011, do 28 de xaneiro:

A utilización do trasmallo será diúrna ou nocturna, excluíntes entre si.

O descanso semanal será obligatorio desde as 12.00 h. do venres ata as 12.00 h. do domingo.

No horario de traballo diúrno os trasmallos poderán estar calados ata dúas horas antes do orto e levantarase como máximo dúas horas despois do ocaso. No horario nocturno, o calamento poderá realizarse dúas horas antes do ocaso e levantarse como máximo dúas horas despois do orto, debendo, en ambos os dous casos, transportarse ao porto coa embarcación.

4º.- Especies.- As especies obxecto da captura serán a xiba e especies acompañantes que deben estar en época de extracción e superar a talla mínima legalmente establecida.

5º.- Zona de traballo.- A zona de traballo será a máis de 100 metros da costa ou 5 metros de profundidade, podendo faenar dentro das liñas de referencia do anexo III do Decreto 15/2011.

6º.- Época autorizada.- A época autorizada abranguerá desde o día 15 de xaneiro de 2023 ata o 16 de xuño de 2023.

Establécese, así mesmo, a prohibición do emprego da arte de trasmallos na Ría de Arousa, por dentro das liñas de referencia do anexo III establecidas no anteriormente



citado Decreto 15/2011, desde o 1 de decembro de 2023 ata a sinatura do novo Plan.

7º.- Puntos de control e venda.- Zonas de pesca, portos, centros de descarga, lonxas e centros de venda autorizados.

8º.- Control e seguimento da actividade pesqueira.-

A) Despachos telemáticos.- As embarcacións que faenen acolléndose ao Plan, deberán despachar no apartado de adhesión a plan de explotación: ["TRASMALLOS (07A) PLAN EXPERIMENTAL TRASMALLOS 2023 (RÍA DE AROUSA)"]. Polo tanto, as embarcacións que despachen a un plan de explotación só poderán faenar no mesmo día no ámbito do correspondente plan, e non poderán usar ningunha outra arte que teñan no seu permiso de explotación.

Por outra banda, advírtese que, ao remate da vixencia deste plan, se non se realiza un novo rexistro de actividade pesqueira a embarcación pasaría á situación de "**pendente rexistro actividade**".

B) Seguimento da actividade pesqueira.- Durante o período de vixencia do plan, técnicos da Consellería poderán realizar en calquera das embarcacións autorizadas mostraxes para control, seguimento e avaliación do plan; os armadores deben colaborar de tal xeito que se permita acadar os obxectivos propostos. **A falta de colaboración neste eido ocasionará a baixa definitiva do plan.**

Así mesmo, complementariamente ás medidas de control para a pesca profesional recollidas no devandito plan experimental de trasmallos, debemos subliñar que esas medidas son aplicables no ámbito de pesca marítima de recreo, tal e como se recolle no artigo 26.1 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, de pesca de Galicia.

9º.- Extracción e comercialización.- O exercicio da actividade extractiva e comercial establecida neste plan está sometida ao estrito cumprimento da normativa vixente en materia de extracción e comercialización de produtos da pesca fresca.

10º.- Infraccións e sancións.- O incumprimento das condicións establecidas neste plan, poderá ser sancionado segundo o establecido na Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro.

Segundo o establecido no artigo 10 da Lei 7/1992, do 24 de xullo, de pesca fluvial, queda prohibida a comercialización de calquera especie de salmonídos non



procedentes de centros de producción autorizados en toda época, fose cal fose o sistema de captura.

Contra esta resolución, que esgota a vía administrativa, poderá interpoñerse recurso de reposición no prazo dun mes, contado desde o día seguinte ao da súa notificación, ante a conselleira do Mar, de conformidade co disposto nos artigos 123 e 124 da Lei 39/2015, do 1 de outubro, do procedemento administrativo común das administracións públicas.

A conselleira do Mar

P.D. Orde do 21-02-2022 (DOG n.º 41, 01-03-2022)

O director xeral de Pesca, Acuicultura e Innovación Tecnolóxica

Antonio Basanta Fernández

